

МАЯ В 11-Й ДЕНЬ

ИЖЕ ВО СВЯТЫХ ОТЕЦ НАШИХ РАВНОАПОСТОЛЬНЫХ МЕФОДИЯ И КИРИЛЛА,
УЧИТЕЛЕЙ СЛОВЕНСКИХ

ВЕЧЕР

Блажен муж: 1-й антифон. На Господи, возвах:

Стихиры праздника 3 и святых 5, глас 2.

Подобен: Киими похвальными:

Киими похвальными венцы * увязем Богомудрыя учителя, * языки словенския, во тьме неведения и сени смертней седящия, * светом Евангелия просветившия, * Троицы Единосущныя велегласныя проповедники. * Имиже и мы, яко дивия маслина, * к благоплодному корени Православия прицепихомся * и прияхом от Христа Бога мир и велию милость. [Дважды.]

Киими похвальными песньми * ублажим Богомудрыя учителя, * Мефодия пустыннолюбнаго, * в безмолвнем пребывании плоды Духа обогатившася, * и Кирилла златолаголиваго, * рачением любомудрия Горнюю премудрость стяжавшаго * и буиих мудрецов агарянских суесловие посрамившаго. * ихже ради Христос Бог наш * дарова и нам велию милость.

Киими песненными добротами * восхвалим Богомудрыя учителя, * Мефодия, вся красная мира любве ради Христовы презревшаго * и во ангельстем образе Небесному Царю крепко воинствовавшаго, * и Кирилла, от отрочества премудрость в сожитие себе избравшаго * и от Бога данныя таланты во славу Его усугубившаго. * Имиже и мы Присносущную Троицу, Отца и Сына и Святаго Духа, * Единого Бога познавше, * имамы от Христа Бога велию милость.

Киими духовными песньми * возвеличим вас, * о преблаженнии учителие, * спасения ради людей словенских апостольски подвизавшиися, * и в просвещении их светом Боговедения добре потрудившиися, * к немуже дверь затворенная * вами писмен словенских изобретением отверзеса нам? * В нюже входяще, * таинство благовестия Христова разумеваем * и приемлем от Христа Бога мир и велию милость.

Слава, глас 6:

Апостолом единомравныя, * иерархов удобрение, * языков словенских просветители и теплыя заступники, * приидите, празднолюбцы, * похвальными пении воспоем, глаголюще: * радуйся, Кирилле, Богословия трубо златокованная, * таинство Святыя Троицы подобием солнечным уяснивый * и тем злохульная уста агарянская заградивый; * радуйся и ты с ним, Мефодие, единомудренно подвизавыйся, * молитвами и знамении тому споспешествуя; * и ныне, отцы всеблаженнии, * не престайте молящися о нас Христу Богу, * верою и любовию вас величающих.

И ныне, праздника.

Вход. Прокимен дне. И чтения три святительская.

Притчей чтение (главы 10 и 8):

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведе разум. Лучше бо сию

куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава, от уст ея исходит правда, закон же и милость на языке носит. Послушайте убо мене, о чада! честная бо реку, и блажен человек, иже пути моя сохранит, исходи бо мои исходи живота и уготовляется хотение от Господа. Сего ради молю вас и предлагаю мой глас сыновом человеческим, яко аз, премудрость, устроих совет, и разум, и смысл аз призвах. Мой совет и утверждение, мой разум, моя же крепость. Аз мене любящия люблю, ищущии же мене обрящут благодать. Разумейте убо, незлобвии, коварство, ненаказанныи же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзки же предо мною устны лживыя. С правдою вси глаголы уст моих, ничтоже в них стропотно, ниже развращенно. Вся права суть разумевающим и проста обретающим разум. Научаю бо вас истине, да будет о Господе надежда ваша, и исполнитесь Духа.

Притчей чтение (главы 10 и 11):

Уста праведнаго капают премудрость, язык же неправеднаго погибнет. Устне мужей праведных капают благодати, уста же нечестивых развращаются. Мерила льстивая мерзость пред Господем, вес же праведен приятен Ему. Идеже аще видет досаждение, тамо и безчестие, уста же смиренных поучаются премудрости. Совершение правых наставит их, и поползновение отрицающихся упасет их. Не пользуют имения в день ярости, правда же избавит от смерти. Умер праведный, остави раскаяние, наручна же бывает и посмеятельна нечестивых пагуба. Правда непорочнаго исправляет пути, в нечестие же падает неправда. Правда мужей правых избавит их, безсоветием же пленяются беззаконнии. Скончавшуся мужу праведну, не погибнет надежда, похвала же нечестивых погибнет. Праведник от лова убежит, в негоже место предается нечестивый. Во устех нечестивых сеть гражданом, чувство же праведных благоспешное. Во благих праведных исправится град, и в погибели нечестивых радование. Во благословении правых возвысится град, усты же нечестивых раскопается. Ругается гражданом лишенный разума, муж же мудрый безмолвие водит.

Премудрости Соломони чтение (глава 4):

Праведник аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости житие нескверное. Благоугоден Богови быв, возлюблен бысть и живый посреде грешник преставлен бысть, восхищен бысть, да не злоба изменит разума его или лесь прельстит душу его. Рачение бо злобы помрачает добрая и парение похоти премеяет ум незлобив. Скончався в мале, исполни лета долга, угодна бо бе Господеви душа его, сего ради потщася от среды лукавствия. Людие же видевше, и не разумевше, ниже положше в помышлении таковое, яко благодать и милость в преподобных Его, и посещение во избранных Его.

На литии стихиры храма. Слава, глас 8:

Яко учителя неложнии, * повеленная Господем сами прежде сотворше * и в благодати апостольства просиявше, * люди словенския наказанныи к благочестию приведосте, * Кирилле и Мефодие Богомудрии, * неверныя же паки вразумисте * к

познанию веры Православныя * и Крещением святым просветисте. * Но убо первии наставницы рода словенскаго * и заповедей Божиих хранителие, * спасайте нас молитвами вашими, * верою и любовию вас в помощь призывающих.

И ныне, праздника.

На стиховне стихиры глас 8:

Светлостию жития вашего, * учителяе равноапостольнии, * яко звезды небесныя, на тверди церковней просияли есте * и, мрежею учений ваших многия языки Христу уловивше, * ко Свету Непреступну востекли есте, * идеже со Ангелы ныне водворяющесе, * мольбу сотворите о нас, * священную память вашу о Господе празднующих.

Стих: Священницы Твои облекутся в правду, * и преподобнии Твои возрадуются.

Приидите, о празднолюбцы, * возвеличим учителя, * апостолом равнопрестольныя и словен славу: * ими бо от прелести бесовския свободившесе, * свет благовестия Христова прияхом * и познахом Предвечное Слово, * от мрака греховнаго избавльшесе.

Стих: Уста праведнаго поучатся премудрости * и язык его возглаголет суд.

Кирилле Богомудре и Мефодие Боголюбиве, * Церкви словенския апостоли и первоучители * и верных заступницы, * благочестия ревнители, * Духа Святаго органи сладкогласнии, * ныне велие дерзновение у Христа Пастыреначальника имуще, * молитесь о нас, честную память вашу совершающих, * да возведет от тли живот наш, яко Многомилостив.

Слава, глас тойже:

Радуйся, двоице священная, * светом Богопознания нас озарившая: * Кирилле, духовныя мудрости источниче живоносный, * языки словенския, жаждею истаявающия, напоивый, * Мефодие, молитвы чистое обиталище. * Христу, Емуже во славе предстоите, * молитесь прилежно, * да купно с вами Его величаем * и превозносим во вся веки.

И ныне, праздника.

На благословении хлебов тропарь святым, дважды.

И Богородице Дево: единожды.

Тропарь святым, глас 4:

Яко апостолом единоправнии * и словенских стран учителяе, * Кирилле и Мефодие Богомудрии, * Владыку всех молитте, * вся языки словенския утвердити в Православии и единомыслии, * умирити мир * и спасти души наша.

НА УТРЕНИ

На Бог Господь: тропарь праздника дважды. Слава: святых глас 4:

Яко апостолом единомравнии * и словенских стран учителя, * Кирилле и Мефодие Богомудрии, * Владыку всех молите, * вся языки словенския утвердiti в Православии и единомыслии, * умирити мир * и спасти души наша.

И ныне: праздника.

По 1-м стихословии седален, глас 3:

Троице Живоначальной, Юже немолчно славословят ангельския силы * и Юже велегласно во языцех проповедасте, * ныне во Свете неприступнем предстояще, молитесь прилежно, Кирилле и Мефодие, * долгов разрешение даровати и вечнаго осуждения избавити * любовию память вашу почитающия.

Слава, и ныне, праздника.

По 2-м стихословии седален, глас 5:

Да радуются днесь роди словенстии, * священную память учителей Богомудрых светло празднующе: * теми бо начатся на сроднем нам языке словенstem литургия Божественная * и все церковное служение совершатся, * и тем неисчерпаемый кладязь воды, текуция в жизнь вечную, дадеся нам * от неяже пиюще, не престанем величати вас, Кирилле и Мефодие. * Вы же, во славе святых веселящися, * молитесь прилежно спастися душам нашим.

Слава, и ныне праздника.

Величание: Величаем вас, святии равноапостольнии Мефодие и Кирилле, вся словенския страны учеными своими просветившия и ко Христу приведшия.

Псалом избранный святительский.

По полиелеи седален, глас 4:

Приидите, просветители наша велегласно хвалами почтим: * тии бо языки словенския, гладом слова Божия погибавшия, * манною учения Богомудраго напитаста * и преложением Благовестия сына Громова на сродную им беседу, * яко лучею солнечною, просветиста, * от неяже и мы озарение приемше, благодарственно воззовем: * радуйтесь, Кирилле и Мефодие приснославнии.

Слава, и ныне, праздника.

Степенна, 1-й антифон 4-го гласа.

Прокимен, глас 4: Священницы Твои облукются в правду, * и преподобнии Твои возрадуются.

Стих: Услышите сия, вси языцы, внушите, вси, живуции по вселенней.

Всякое дыхание:

Евангелие общее святителем.

Рече Господь Своим учеником: вы есте свет мира, не может град укрытися верху горы стоя. Ниже вжигают светильника и поставляют его под спудом, но на свещнице, и светит всем, иже в храмине суть. Тако да просветится свет ваш пред человеки, яко да видят ваша добрая дела и прославят Отца вашего, Иже на небесех. Да не мните, яко приидох разорити закон, или пророки: не приидох разорити, но исполнити. Аминь бо глаголю вам: дондеже преидет небо и земля, иота едина, или едина черта

не преидет от закона, дондеже вся будут. Иже аще разорит едину заповедий сих малых и научит тако человеки, мний наречется в Царствии Небеснем, а иже сотворит и научит, сей велий наречется в Царствии Небеснем.

По 50-м псалме стихира, глас 6:

Излияся благодать во устнах ваших, * преподобнии отцы, * и бысте пастырие Христовы Церкви, * учаще словесныя овцы * веровати в Троицу Единосущную * во Едином Божестве.

Канон праздника на 6 и святых на 8, глас 3.

Песнь 1

Ирмос: Воды древле манием Божественным * во едино сонмище совокупивый * и разделивый море израильским людем, * Сей Бог наш препрославлен есть, * Тому Единому поим, яко прославися.

Воды мятежа мирскаго прейти недоумеая, преподобне Мефодие, оставил еси вся красная мира сего и, во ангельстем образе на невидимыя враги воинствуя, Богу единому поработал еси, радостно воспевая: Тому единому поим, яко прославися.

Избранный сосуд от пелен показался еси, Кирилле блаженне, юношеских шатаний чужд явився и Мудрость Божественную возлюбив, темже Святыя Православныя Церкви учением просвещен, и сам многим учитель и просветитель был еси.

Водами учений ваших оросившася, словенския страны даже дондесь Владыце Христу плоды благоприятны приносят. Сего ради ублажает вас Святая Церковь, зовущи: от бед избавите нас, угодницы Христовы.

Богородичен: Воды греховныя видоша до души моя, Владычице, и в тимении страстей углебох, к Тебе прибегаю, Всенепорочная, нечистых помышлений волнение утиши и мирное устроение ми даруй.

Песнь 3

Ирмос: Иже от несущих вся приведый, * словом созидаемая, * совершаемая Духом, * Вседержителю Вышний, * в любви Твоей утверди мене.

Глагол Господень, яко – иже по Мне ити хочет, да возьмет крест свой, – слухом сердца твоего услышав, преподобне Мефодие, крест иноческаго жития возложив на рамо твое, последовал еси Христу, Егоже моли, да и мене, хладнаго, в любви Своей утвердит.

Иже древле Иакову в соннем видении лествицу, к небеси возводящую, показа, Той и тебе, святе Кирилле, еще отроку сущу, в дивнем сне Софию деву обручи: се же бысть Престолу Его приседящая Премудрость, Яже в любви Всевышняго утверди тя.

Иже от не сущих вся Приведый, и вас, отцы досточуднии, от чрева матерня освяти в сосуды избранная Себе, во еже пронести Имя Его пред языки; темже честную память вашу совершающе, молим вас, Кирилле и Мефодие, влающийя ум наш во исповедании правыя веры утвердити.

Богородичен: Яже мирови мир подавшая и Начальника тишины рождающая, укроти волны страстей моих, Чистая, и на камени мя безстрастия утверди.

Святым седален, глас 4:

Уподобил еси солнцу Троицу Святую Единосущную, Кирилле Богодухновенне, * во образ Святыя Троицы зримому на небеси солнцу создану быти, глаголя: * подобие Бога Отца солнечный круг есть, * не имый конца, ни начала, * и, якоже от круга солнечна исходит луча света, поднебесную просвещающая, * сице от Бога Отца раждается Сын, Отчее сияние, * теплота же, вселенную оживляющая, * от тогожде круга купно с лучею изливаемая, * подобие есть Духа Святаго, * от Тогожде Отца исходящаго. * Дивному учению твоему внемлюще, * и мы в Троице Единому Богу покланяемся, * память же твою ублажаем, досточудне.

Слава, и ныне, праздника.

Песнь 4

Ирмос: Положил еси к нам твердую любовь, Господи: * Единороднаго бо Твоего Сына * за ны на смерть дал еси. * Темже Ти зовем, благодаряще: * слава силе Твоей, Господи.

Положил еси хранение заповедей, яко камень краеуголен, на немже созидае храмину души твоя, преподобне Мефодие, Духа Святаго селение сотворил ю еси; аз же, селение греха сый, к тебе припадаю, всеблаженне, очисти мя рососою молитв твоих, да зову, благодаря: слава силе Твоей, Господи.

Даждь ми, да разумею, что есть угодно Тебе, Владыко,— взывал еси, блаженне Кирилле, егда со юным царем в научение книжное вдан был еси. Сего ради, купно со внешним любомудрием, Духа премудрости и страха Божия свыше приял еси, земную же мудрость ни во чтоже вменил еси, зовый: слава силе Твоей, Господи.

Положил еси любовь к Зиждителю твоему, яко печать, на сердце твоём, всеблаженне. Сего ради земную обручницу и славу мира сего отринул еси, Кирилле, и, яко птица, от сети ловящих бегая, в тихое пристанище иночествующих достиг еси и в ризу радования облекся еси, воспевая со Мефодием: слава силе Твоей, Господи.

Богородичен: Положив беззакония и неправды моя предо мною, вижду, яко паче песка морскаго умножишася. К Тебе прибегаю, Всенепорочная, струпы души моя исцели, да зову к Рождшемуся от Тебе, благодаря: слава силе Твоей, Господи.

Песнь 5

Ирмос: Яко виде Исаия образно * на Престоле превознесена Бога, * от Ангел славы дориносима, * о, окаянный, — вопияше, — аз! * провидех бо воплощаема Бога, Света Невечерня, * и миром Владычествующа.

Яко крин благоуханный, в пустыни процвел еси, преподобне Мефодие, молитвами, бдением и пощением душу твою украшая, и, на земли равноангельно пожив, ныне со Ангелы светло созерцаеши Света Невечерня и миром Владычествующа.

От Ангел славы дориносимому моляся в пустыни, Кирилле, нуждею в Царствующий град возвращен был еси и саном священства украсился еси, да путь спасения человеком покажеш, светом учения просвещая и Безкровную Жертву о всех принося Свету Невечернему и миром Владычествующу.

Яко кладязь премудрости неисчерпаемый, явился еси, Богоносе Кирилле, егда в сарацны на препрение хулящих Пресвятую Троицу от царя послан был еси: не

возмогша бо мутными водами злоучения потопити тя, Светом Невечерним свыше озаряема.

Богородичен: Яко древо неплодное, сый, како не ужаюся грозного посещения, о окаянный аз! Скоро притецы ко Богоблагодатней, душе моя: аще бо не Она заступит тя, узрети не имаши Света Невечерня и миром Владычествующа.

Песнь 6

Ирмос: Бездна последняя грехов обыде мя, * и исчезает дух мой; * но прострый, Владыко, высокую Твою мышцу, * яко Петра, мя, Управителю, спаси.

Се, яко пучина морская, естество Божие есть, непостижимое умом и неизреченное глаголы,— рекл еси ко агаряном, премудре Кирилле,— тую бо пучину кроме святого Евангелия преплыти хотящии потопляются, не ведуще пети: яко Петра ны, Управителю, спаси.

В бездне разума лжеименного углубшии агаряне тайно яд смертный предложиша тебе; реки же во Евангелии Христос: яко аще что смертно испиете, не вредит вы,— соблюде тя цела и с честью в Царствующий град возврати. Ты же, царем и патриархом достойно ублажаемь, не превознеслся еси и взывати не престал еси: яко Петра мя, Управителю, спаси.

Древле реки Божественный Дух: отделите Ми Варнаву и Савла на дело, на неже призвах их; подобне и вас, отцы преподобнии, в словенския страны послати повеле, и тако людие, во тьме и сени смертней седящии, светом учения вашего просветившися, возваша: яко Петра ны, Управителю, спасл еси.

Богородичен: Бездна последняя грехов обыде мя, и, трепетом одержимь есмь, ужасаяся всеконечного потопления. Темже мольбу приношу Ти, Пренепорочная: помилуй страстную мою душу, простри руку Твою, яко Благая, и, яко Петра спасе Сын Твой, тако мя, Управительнице, спаси.

Кондак, глас 3:

Священную двоицу просветителей наших почтим, * Божественных писаний преложением источник Богопознания нам источивших, * из негоже даже дондесь неоскудно почерпающе, * ублажаем вас, Кирилле и Мефодие, * Престолу Вышняго предстоящих * и тепле молящихся о душах наших.

Икос: В добродетели просиявшия проповедники благочестия, истинныя столпы и основания Церкви, трубы Божественныя Христовых догматов, Богоносныя отцы Мефодия и Кирилла, приидите, вернии, восхвалим: тии бо, мрак неверия от нас отгнавши и ереси нечестия огнем Духа поपालивши, преложением писаний род словенский из дивия маслины в благоплодную премениша, и Божественным Крещением в веру Христову приведоша, и вселенную всю множеством чудес исполниша. Того ради днесь аки венценосцы предстоят Вседержителю Богу, к нимже возопиим: отцы Божественнии и равноапостольнии, предстательством вашим даруйте всем племеном словенским в правоверии твердость и единомыслие, тепле молящися о душах наших.

Песнь 7

Ирмос: Прежде образу златому, персидскому чтилищу, * отроцы не поклоняшася, * трие поюще посреде печи: * отцев Боже, благословен еси.

Прежде един со Единым пребывая, душу твою, яко рай богонасажденный, сотворил еси, Мефодие, таже на проповедь апостольскую купно с Богомудрым Кириллом шед, во странах словенских потрудился еси, идеже, яко отроцы, огнем нечестия неопалыми, воспевасте: отцев Боже, благословен еси.

Иудей и сарацыны препрел еси, премудре Кирилле, и страну Хазарскую святым Крещением просветил еси, узников множество свободя, и в пустыни безводней воду сланую в сладкую преложил еси. Людие же, спасеннии тобою, воспеваху: отцев Боже, благословен еси.

Сосуди избранныи бысте, отцы преподобнии, пронести Имя Господне пред языки, сего ради и ины страны словенския возжелеша светом учения вашего озаритися. Вы же предсудисте сладость безмолвия на труд апостольский пременити, да множайшия Христу приобрящете и купно с ними воспоете: отцев Боже, благословен еси.

Богородичен: Сосуд полн страстей есмь, Пресвятая Богородице Дево, и смерти оныя последняя и огненнаго прещения страшуся. Но Ты, Пречистая, спаси мя, погибающаго, крепостию препояши дух мой, да пленицы греховныя расторг, благодарственно воспою: Избавителя плененных рождающая, благословена еси.

Песнь 8

Ирмос: Вещественнаго огня пламень * невестественным увядиша Богозримии отроцы, и пояху: * благословите, вся дела Господня, Господа.

Невещественным светом благодати выну озаряемь, приял еси сан священства, блаженне Кирилле, и споспешествующу тебе Духу Святому, писмена словенская избрел еси, да богодухновенных книг на сродную им беседу преложением людие просветившися, воспоют: благословите, вся дела Господня, Господа.

Первое сына Громова неземныя глаголы: в начале бе Слово,– яко веры нашае главизну возгремели есте, отцы всехвальнии. Темже псалтирь сладкогласную на глаголы словенския преложили есте, еюже и ныне Святая Церковь, веселящися, взывает: благословите, вся дела Господня, Господа.

Невещественным сокровищем обогатисте нас, отцы досточуднии: Божественная бо Литургия на языке словенстем начатся от вас совершатися. Сея благодати и мы доднесь причастицы суще, воспеваем Бога, глаголюще: благословите, вся дела Господня, Господа.

Богородичен: Огнь искушений и напастей злых обыде мя, к Тебе прибегаю, Богородице Дево: не презри, Чистая, молений раба Твоего, от одержавших мя лютых избави, да, благословляя, благословлю Тя и превознесу имя Твое во веки.

Песнь 9

Ирмос: Тебе, неопалимую купину и Святую Деву, * Матерь Света и Богородицу, * надежду всех нас, величаем.

Тебе по достоянию восхвалити кто возможет, Мефодие всеславне? Подвиги и труды твоя, яже апостольски спасения ради людей заблуждших подъял еси, Кирилле, кто изочтет? Паче же мы, вами славити Бога Вышняго на сродном нам языке научившися, единомудренно и вас с Ним величаем.

Тебе, Кирилле блаженне, яко уже дело совершившу и течение скончавшу, бысть извещение свыше о кончине твоей, еже приим, радостно воспел еси: о рекших мне,

внидем во дворы Господни, возвеселися дух мой. Таже вожделев, в Горняя душею вознесся еси, идеже с Небесными силами Троицу Единосущную выну величаеши.

Церкве Моравския епископство прием, преподобне Мефодие, многия труды и подвиги, веру святую возвещая, подъял еси, многия беды и изгнания претерпел еси, ныне же купно со святым Кириллом в Вышних радующеся, молитесь о нас, да мы яко заступники и ходатаи наша выну вас величаем.

Богородичен: Превышшая Ангел и Херувим честнейшая, предстательством святых Кирилла и Мефодия, на наше смирение умилосердися, молим Ти ся, из глубины греховныя возведи и вечнаго осуждения нас избави, да купно с ними Тебе, Матерь Света и Богородицу, надежду всех нас, величаем.

Светилен:

Учители святии, * память вашу светло празднующе, * молим вас всеусердно: * языки, ихже сокровищем благовестия обогатисте, * на камени исповедания Христова утвердите, * и соблюдайте в мире живот наш.

Слава, и ныне, праздника.

На хвалитех стихиры праздника 3 и святых 3, глас 4.

Подобен: Яко добля:

Кирилле и Мефодие Богомудрии, * апостольским стопам последующе, * ко взысканию людей заблуждших единомудренно подвигшеся, * яко орли скоропарящии, страны словенския облетели есте, * яже светом богопознания озаривше, * приведосте ко Иисусу Человеколюбцу * и Спасу душ наших.

Винограда Христова делателие, * благочестия насадители, * люди словенския, яко драхму погибшую, * со тщанием взыскавше обрели есте, Богоноснии отцы, * юже в сокровищницу жизни вечныя прият, * радуясь, со Ангелы Иисус Человеколюбец, * и Спас душ наших.

Святыя Троицы поборницы * и заблуждших наставницы, * злохуление агарянское препревшии * и нечестие иудейское посрамившии, * Церковь, юже стяжали есте * богоугодными труды и поты вашими, * сохранити потщитесь от наветов вражиих невредену * и благоприятну Иисусу Человеколюбцу * и Спасу душ наших.

Слава, глас 6:

Просветителей наших благочестно память совершающе, * людие, благодарственно возопим: * радуйтесь, светильницы пресветлии, * светом Богопознания страны словенския озарившии, * радуйтесь, пастырие добрии, * словесныя овцы, в дебрех неверия разсеянный, * во едино собравшии * и к Пастыреначальнику Христу приведшии. * Егоже величающе, вас ублажаем.

И ныне, праздника.

Славословие великое. И отпуст.

НА ЛИТУРГИИ

Блаженны от канона праздника, и святых, песни 3-я.

Глагол Господень, яко – иже по Мне ити хоцет, да возьмет крест свой,— слухом сердца твоего услышав, преподобне Мефодие, крест иноческаго жития возложив на рамо твое, последовал еси Христу, Егоже моли, да и мене, хладнаго, в любви Своей утвердит.

Иже древле Иакову в соннем видении лествицу, к небеси возводящую, показа, Той и тебе, святе Кирилле, еще отроку сущу, в дивнем сне Софию деву обручи: се же бысть Престолу Его приседящая Премудрость, Яже в любви Всевышняго утвердитя.

Слава: Иже от не сущих вся Приведый, и вас, отцы досточуднии, от чрева матерня освати в сосуды избранная Себе, во еже пронести Имя Его пред языки; темже честную память вашу совершающе, молим вас, Кирилле и Мефодие, влающийся ум наш во исповедании правыя веры утвердити.

И ныне: Богородичен: Яже мирови мир подавшая и Начальника тишины рождающая, укроти волны страстей моих, Чистая, и на камени мя безстрастия утверди.

Тропарь святым, глас 4:

Яко апостолом единоплавнии * и словенских стран учителяе, * Кирилле и Мефодие Богомудрии, * Владыку всех молите, * вся языки словенския утвердити в Православии и единомыслии, * умирити мир * и спасти души наша.

Кондак святым, глас 3:

Священную двоицу просветителей наших почтим, * Божественных писаний преложением источник Богопознания нам источивших, * из негоже даже доднесь неоскудно почерпающе, * ублажаем вас, Кирилле и Мефодие, * Престолу Вышняго предстоящих * и тепле молящихся о душах наших.

Прокимен, глас 7: Честна пред Господем * смерть преподобных Его.

Стих: Что воздам Господеви о всех, яже воздаде ми?

Апостол ко Евреем, зачало 318.

Братие, таков нам подобаше Архиерей, преподобен, незлобив, безсквернен, отлучен от грешник и вышше Небес быв. Иже не имать по вся дни нужды, якоже первосвященницы, прежде о своих гресех жертвы приносить, потом же о людских: сие бо сотвори единою, Себе принес. Закон бо человеки поставляет первосвященники, имущия немощь, слово же клятвенное, еже по законе, Сына во веки совершенна. Глава же о глаголемых: такова имама Первосвященника, иже седе одесную Престола Величества на Небесех, святым служителю и скинии истинней, иже водрузи Господь, а не человек.

Аллилуя, глас 2: Священницы Твои облекутся в правду, * и преподобнии Твои возрадуются.

Евангелие от Матфея, зачало 11.

Рече Господь Своим учеником: вы есте свет мира, не может град укрытися верху горы стоя. Ниже вжигают светильника и поставляют его под спудом, но на свещнице, и светит всем, иже в храмине суть. Тако да просветится свет ваш пред человеки, яко да видят ваша добрая дела и прославят Отца вашего, Иже на небесех. Да не мните, яко приидох разорити закон, или пророки: не приидох разорити, но исполнити. Аминь бо глаголю вам: дондеже преидет небо и земля, иота едина, или едина черта не преидет от закона, дондеже вся будут. Иже аще разорит едину заповедий сих малых и научит тако человеки, мний наречется в Царствии Небеснем, а иже сотворит и научит, сей велий наречется в Царствии Небеснем.

Причастен: В память вечную:

Молитва

О преславнии просветителие словенских язык, святии равноапостольнии Мефодие и Кирилле, ваших писмен и учений светом просветившесе и в вере Христовой наставльшесе, яко чада ко отцем, усердно ныне прибегаем и сокрушением сердечным молимся: аще и завет ваших не соблюдохом, о угождении бо Богу небрегохом и от братняго единомыслия в вере отпадохом, обаче якоже древле в земном житии вашем, сице и ныне грешных и недостойных не отвратите тщи, но, яко имуще велие ко Господу дерзновение, прилежно Того молитесь, да обратит нас в путь спасения, да умирит раздоры единоверных, да приведет к единомыслию отпадших и всех нас духом любви да соединит Единой Святей, Соборней и Апостольстей Церкви! Вемы бо, яко много может молитва праведных ко благосердию Владыки. Не оставите убо нас, унылых и недостойных, чад ваших, ихже ради грехов паства ваша, враждою разделяема и соблазнами инославных прельщаема, умалися, овцы же словесныя, разреваемы, восхищаются волки губительными. Подаждьте убо нам молитвами вашими ревность Православия, яко да отеческая предания добре сохраним, каноны церковныя верно соблюдем, всяких лжеучений странных отбежим и, тако в житии богоугодном преспевающе, жизни райския на Небеси сподобимся, идеже купно с вами прославим в Троице Единого Бога во веки веков. Аминь.

Ина молитва

О всехвальнии равноапостоли Мефодие и Кирилле, припадающе пред честною иконою вашею, усердно молим вы: воззрите милостивно на нас, ихже трудом вашим просветили есте, и оградите нас неусыпным предстательством вашим от злых козней вражиих! Призрите убо на виноград сей, егоже насадили есте, и не предайте дивеему вепрю озобати его. Сохраните, святии угодницы Божии, Церковь нашу Православную, юже вы наздали есте на краеугольном Камени, Христе, яко да будет недвижима, но да разсыпятся о Камень сей волны всякаго маловерия. Укрепите пастырей наших во всех добродетелех и в подвиже проповедания, вразумите же пасомых, во еже послушати гласа их. Сохраните вся страны словенския от всякаго оскудения, от огня и меча, от смертоносныя язвы и от всякаго зла. Услышите и всякаго человека, с верою к вам приходящаго и благодатныя помощи вашей требующаго. В страшный же час смертный предстаните всем нам блазии ходатаи и темных зраков демонских прогонителие, да в мире и покаянии скончавше земное

поприще, достигнем вечных благ наслаждения и купно с вами прославим Пресвятую Троицу – Отца и Сына и Святаго Духа, ныне, и присно, и во веки веков. Аминь.